

四庫全書

史部

欽定四庫全書

史部

通志卷一百七十九

詳校官編修_臣李潢

編修_臣裴謙覆勘

覆校官助教_臣金學詩

校對官主事_臣張培

謄錄監生_臣莊瑩

欽定四庫全書

通志卷一百七十九

宋右廸功郎鄭

樵漁仲撰

宦者傳第二

秦

趙高

前漢

李延年

石顯

後漢

鄭衆 蔡倫 孫程 曹騰 單超

徐璜
左官

具瑗
唐衡

侯覽 曹節 呂彊 張讓

趙忠

後魏

宗愛 仇洛齊 孫小 趙默 王琚 張宗之

劇鵬 張祐 抱嶷 王遇 苻承祖 王質

李堅 劉騰 賈粲 楊範 成軌 王溫 孟

樂 平季 封津 劉思逸

張景嵩
毛暢

北齊諸宦者

臣謹按心平者然後可以語道氣和者然後可以論人論人之道不可偏徇仰觀諸天則帝座之旁有宦者之星遠稽諸古則周官之書有寺人之職而先儒之論直欲無宦者可乎人之邪正色色有之言宦寺之中而無正人乎司馬遷班固不立宦者傳特取數人在佞幸篇如此是絕人為善之路也且荅伯之辭著於風雅勃鞞之忠載於春秋繆賢之賢能薦相如

韓談之勇能刃趙高西都則張澤安劉之功參乎平
勃東京則欒巴按節之義間乎陳竇歷世班班皆有
其人惜乎史家畧之不得而記云

秦

趙高者諸趙疏遠屬也昆弟數人皆生而隱宮其母被
刑僂世世卑賤始皇聞其彊力通獄法舉以為中府令
使教公子胡亥決獄高嘗有罪始皇使上卿蒙毅治之
毅不敢阿法當高罪死除其官爵始皇以高之敢於事

也赦之復其官爵高以故深怨蒙氏始皇三十七年十月行幸會稽並海上北抵琅邪高以中車府令兼行符璽事與丞相斯皆從始皇有二十餘子長子扶蘇以數直諫上上使監兵上郡而蒙毅兄恬為將胡亥以少子愛請從上許之餘子莫從其年七月始皇至沙邱病甚令高為書賜長子扶蘇曰以兵屬蒙恬與喪會咸陽而葬書已封未授使者而始皇崩高因留所賜扶蘇璽書而謂胡亥曰上崩無詔封王諸子而獨賜長子書長子

至即立為皇帝而子無尺寸之地為之奈何胡亥曰固也吾聞之明君知臣明父知子父捐命不封諸子何可言者高曰不然方今天下之權存亡在子與高及丞相耳願子圖之且夫臣人與見臣於人制人與見制於人豈可同日道哉胡亥曰廢兄而立弟是不義也不奉父詔而畏死是不孝也能薄而材譎彊因人之功是不能也三者逆德天下不服身殆傾危社稷不血食高曰臣聞湯武殺其主天下稱義焉不為不忠衛君殺其父而

衛國載其德孔子著之不為不孝夫大行不小謹盛德
不辭讓鄉曲各有宜而百官不同功胡顧小而忘大後
必有害狐疑猶豫後必有悔斷而敢行鬼神避之後有
成功願子遂之胡亥喟然嘆曰今大行未發喪禮未終
豈宜以此事干丞相哉高曰時乎時乎間不及謀羸糧
躍馬唯恐後時胡亥既然高曰不與丞相謀恐事不能
成臣請為子與丞相謀之高乃謂丞相斯曰上崩賜長
子書與喪會咸陽而立為嗣書未行今上崩未有知者

也所賜長子書及符璽皆在胡亥所定太子在君侯與高之口耳事將何如斯曰安得亡國之言此非人臣所當議也高曰君侯自料材能孰與蒙恬功高孰與蒙恬謀遠不失孰與蒙恬無怨於天下孰與蒙恬長子舊而信之孰與蒙恬斯曰此五者皆不及蒙恬而君責之何深也高曰高故內官之廝役也幸以刀筆之文進入秦宮管事二十餘年未嘗見秦免黜丞相功臣有封及二世者也卒皆以誅亡皇帝二十餘子皆君之所知長子

剛毅而武勇信人而奮士即位必用蒙恬為丞相君侯
終不懷通侯之印歸於鄉里明矣高受詔教習胡亥使
學以法事數年矣未嘗見過失慈仁篤學輕財重士辯
於心而詘於口盡禮敬士秦之諸子未有及此者可以
為嗣君審計而定之斯曰君其反位斯奉主之詔聽天
之命何慮之可足也高曰安可危也危可安也安危不
定何以貴聖斯曰斯上蔡閭巷布衣也上幸擢為丞相
封為通侯子孫皆至尊位重祿者故將以存亡安危屬

臣也豈可負哉夫忠臣不避死而庶幾孝子不勤勞而見危人臣各守其職而已矣君其勿復言將令斯得罪高曰蓋聞聖人遷徙無常就變而從時見末而知本觀指而覩歸物固有之安有常法哉方今天下之權命懸於胡亥高能得志焉且夫從外制中謂之惑從下制上謂之賊故秋霜降者草木落水搖動者萬物作此必然之效也君何見之晚斯曰吾聞晉易太子三世不安齊桓兄弟爭位身死為戮紂殺親戚不聽諫者國為邱墟

遂危社稷三者逆天宗廟不血食斯其猶人哉安足為
謀高曰上下合同可以長久中外若一事無表裏君聽
臣之計即長有封侯世世稱孤必有喬松之壽孔墨之
智今釋此而不從禍及子孫足以為寒心善者因禍為
福君何處焉斯乃仰天而歎垂涕太息曰嗟乎獨遭亂
世既以不能死安託命哉於是斯乃聽高高乃報胡亥
曰臣請奉太子之明命以報丞相丞相斯敢不奉令於
是乃相與謀詐為受始皇詔丞相立子胡亥為太子更

為書賜長子扶蘇曰朕巡天下禱祠名山諸神以延壽命今扶蘇與將軍蒙恬將師數十萬以屯邊十有餘年矣不能進而前士卒多耗無尺寸之功乃反數上書直言誹謗我所為以不得罷歸為太子日夜怨望扶蘇為人子不孝其賜劍以裁將軍恬與扶蘇居外不匡正宜知其謀為人臣不忠其賜死以兵屬裨將王離封其書以皇帝璽遣胡亥容奉書賜扶蘇於上郡使者至發書扶蘇泣入內舍欲自殺蒙恬止扶蘇曰陛下居外未立

太子使臣將三十萬衆守邊公子為監此天下重任也
今一使者來即自殺安知其非詐請復請而後死未暮
也使者數趣之扶蘇為人仁謂蒙恬曰父而賜子死尚
安復請即自殺蒙恬不肯死使者即以屬吏繫於陽周
使者還報胡亥斯高大喜至咸陽發喪太子立為二世
皇帝以趙高為郎中令常侍中用事二世燕居乃召高
與謀事謂曰夫人生居世間也譬猶騁六驥過決隙也
既已臨天下矣欲悉耳目之所好窮心志之所樂以安

宗廟而樂萬姓長有天下終吾年壽其道可乎高曰此
賢主之所能行也而昏亂主之所禁也臣請言之不敢
避斧鉞之誅願陛下少意焉夫沙邱之謀諸公子及大
臣皆疑焉而諸公子盡帝兄大臣又先帝之所置也今
陛下初立此其屬意怏怏皆不服恐為變且蒙恬已死
蒙毅將兵居外臣戰戰栗栗唯恐不終且陛下安得為
此樂乎二世曰為之奈何趙高曰嚴法而刻刑令有罪
者相坐誅至收族滅大臣而遠骨肉貧者富之賤者貴

之盡除去先帝之故臣更置陛下之所親信者近之此則陰德歸陛下害除而姦謀塞羣臣莫不被潤澤蒙厚德陛下則高枕肆志寵樂矣計莫出於此二世然高之言乃更為法律於是羣臣諸公子有罪輒下高令鞠治之殺大臣蒙毅等公子十二人僇死咸陽市十公主矧死於社財物入於縣官相連坐者不可勝數公子高欲奔恐收族乃上書曰先帝無恙時臣入則賜食出則乘輿御府之衣臣得賜之中廐之寶馬臣得賜之臣當從

死而不能為人子不孝為人臣不忠不忠者無名立於世臣請從死願葬酈山之足唯上幸哀憐之書上二世大說召趙高而示之曰此可謂急乎趙高曰人臣當憂死而不暇何變之得謀胡亥可其書賜錢十萬以葬法令誅罰日益刻深羣臣人人自危欲畔者衆二世又作阿房之宮治直馳道賦斂愈重戍徭無已於是楚戍卒陳勝吳廣等作亂郡縣皆殺長吏以應之者時趙高為郎中令所殺及報私怨衆多恐大臣入朝奏事毀惡之

乃說二世曰天子所以貴者但以聞聲羣臣莫得見其面故號曰朕且陛下富於春秋未必盡通諸事今坐朝廷譴舉有不當者則見短於大臣非所以示神明於天下也且陛下深拱禁中與臣及侍中習法者持事事來有以揆之如此則大臣不敢奏疑事天下稱聖主矣二世用其計乃不坐朝廷見大臣居禁中趙高常侍中用事事皆決於趙高高聞李斯以為言乃見丞相曰關東羣盜多今上急發繇作阿房宮治直馳道聚狗馬無用

之物臣欲諫為位賤此真君侯之事君何不諫李斯曰
固也吾欲言之久矣今時上不坐朝廷上居深宮吾有
所言者不可傳也欲見無間趙高謂曰君誠能諫請為
君侯上間語君於是趙高待二世方燕樂婦女居前使
人告丞相上方間可奏事丞相至宮門上謁如此者三
二世怒曰吾常多間日丞相不來吾方燕私丞相輒來
請事丞相豈少我哉且固我哉高因曰如此殆矣夫沙
邱之謀丞相與焉今陛下已立為帝而丞相貴不益此

其意亦望裂地而王矣且陛下不問臣臣不敢言丞相
長男李由為三川守楚盜陳勝等皆丞相傍縣之子以
故楚盜公行過三川城守不肯擊高聞其文書相往來
未得其審故未敢以聞且丞相居外權重於陛下二世
以為然欲案丞相恐其不審乃使人案驗三川守與盜
通狀李斯知為高所陷乃上書言高擅權與陛下等將
有齊田恒宋子罕之事二世曰何哉夫高故宦人也然
不為安肆志不以危易心潔行修善自使至此以忠得

進以信守位朕實賢之而君疑之何也且朕少失先人
無所識知不習治民而君又老恐與天下絕矣朕非屬
趙君當誰任哉且趙君為人精廉彊力下知人情上能
適朕君其勿疑李斯曰不然夫高故賤人也無識於理
貪欲無厭求利不止列勢次主求欲無窮臣故曰殆二
世已前信趙高恐李斯殺之乃私告趙高高曰丞相所
患者獨高高已死丞相即欲為田恒等所為於是二世
使高案丞相獄治罪責李斯與子由謀反狀皆收捕宗

族賓客高治斯榜掠千餘斯不勝痛自誣服斯又自負其辯有功無反心從獄中上書自陳幸二世悟而赦之高使棄去不奏又使其客十餘輩詐為御史謁者侍中更往來覆訊斯更以實對輒復榜之後二世使人驗斯斯以為如前終不敢更言所使案三川守由者至則楚兵已擊殺之矣高皆妄為反辭以相傳遂具斯五刑論腰斬咸陽市夷三族李斯已死二世遂拜高為丞相事無大小輒決於高高自知其權重乃獻鹿謂之馬二世

問左右此乃鹿也左右皆曰馬也二世驚自以為惑乃召太卜令卦之太卜曰陛下春秋郊祀奉宗廟鬼神齋戒不明故至於此可依盛德而明齋戒於是乃入上林齋戒日游弋獵有行人入上林中二世自射殺之趙高教其子婿咸陽令閭樂劾不知何人賊殺人移上林中趙高乃諫二世曰天子無故賊殺不辜人此上帝之禁也鬼神不享天且降殃當遠避宮以禳之二世乃出居望夷宮留三日趙高詐詔衛士令士皆素服持兵內鄉

入告二世曰山東羣盜兵大至二世上觀而見之恐懼
高即因劫令自殺引璽而佩之左右百官莫從上殿欲
壞者三高自知天弗與羣臣弗許乃召扶蘇之子子嬰
立之子嬰即位以計稱疾不聽事與宦者韓談及其子
謀殺高高上謁請病因召入令韓談刺殺之夷高三族

前漢

李延年中山人身及父母兄弟皆故倡也延年坐法腐
刑給事狗監中

主獵犬

女弟得幸於武帝號李夫人列后

妃傳延年善歌為新變聲是時上方興天地諸祠欲造樂令司馬相如等作詩頌延年輒承意絃歌所造詩為之新聲曲而李夫人產昌邑王延年由是貴為協律都尉佩二十石印綬而與上卧起其愛幸埒於韓嫣久之延年弟季與中人亂出入驕恣及李夫人卒後其愛弛上遂誅延年兄弟宗族是後寵臣大抵外戚之家也衛青霍去病皆愛幸然亦以功能自進

石顯字君房濟南人弘恭沛人也皆少坐法腐刑為中

黃門以選為中尚書宣帝時任中尚書官恭明習法令
故事善為請奏能稱其職恭為令顯為僕射元帝即位
數年恭死顯代為中書令是時元帝被疾不親政事方
隆好於音樂以顯久典事中人無外黨精專可信任遂
委以政事事無大小因顯白決貴幸傾朝百僚皆敬事
顯顯為人巧慧習事能探得人主微指內深賊持詭辯
以中傷人忤恨睚眦輒被以危法初元中前將軍蕭望
之及光祿大夫周堪宗正劉更生皆給事中望之領尚

書事知顯專權邪辟建白以為尚書百官之本國家樞
機宜以通明公正處之武帝遊宴後庭故用宦者非古
制也宜罷中書宦官應古不近刑人元帝不聽由是大
與顯忤後皆害焉望之自殺堪更生廢錮不得復進用
語在望之傳後太中大夫張猛魏郡太守京房御史中
丞陳咸待詔賈捐之皆嘗奏封事或召見言顯短顯索
求其罪房捐之棄市猛自殺於公車咸抵臯髡為城旦
及鄭令蘇建得顯私書奏之後以他事論死自是公卿

以下畏顯重足一迹顯與中書僕射牢梁少府五鹿充
宗結為黨友諸附倚者皆得寵位民歌之曰牢邪石邪
五鹿客邪印何累累綬若若邪言其兼官據執也顯見
左將軍馮奉世父子為公卿著名女又為昭儀在內顯
心欲附之薦言昭儀兄謁者遂修勅宜侍帷幄天子召
見欲以為侍中遂請閒言事上聞遂言顯顓權天子大
怒罷遂歸故官其後御史大夫缺羣臣皆舉遂兄大鴻
臚野王行能第一天子以問顯顯曰九卿無出野王者

然野王親昭儀兄臣恐後世必以陛下度越衆賢私後
宮親以為三公上曰善吾不見是乃下詔嘉美野王廢
而不用語在野王傳顯自知顯權事柄在掌握恐天子
一旦納用左右耳目有以間已乃時歸誠取一信以為
驗顯嘗使至諸官有所徵發顯先自白恐後漏盡宮門
閉請使詔吏開門上許之顯故投夜還稱詔開門入後
果有上書告顯顯命矯詔開宮門天子笑以其書示顯
顯因泣曰陛下過私小臣屬任以事羣下無不嫉妬欲

陷害臣者事類如此非一唯明主獨知之愚臣微賤誠不能以一軀稱快萬衆任天下之怨臣願歸樞機受後宮埽除之役死無所恨唯陛下哀憐財幸以此全活小臣天子以為然而憐之數勞勉顯加厚賞賜賞賜及賂遺賫一萬萬初顯聞衆人勾勾言已殺前將軍蕭望之望之當世名儒顯恐天下學士姍已病之是時明經著節士琅邪貢禹為諫大夫顯使人致意深自結納顯因薦禹天子歷位九卿至御史大夫禮事之甚備議者於

是稱顯以為不妬譖望之矣顯之設變詐以自解免取
信人主者皆此類也元帝晚節寢疾定陶恭王愛幸顯
擁祐太子頗有力元帝崩成帝初即位遷顯為長信中
太僕秩中二千石顯失倚離權數月丞相御史條奏顯
舊惡及其黨與牢梁陳順皆免官顯與妻子徙歸故郡
憂慙不食於道病死諸所交結以顯為官皆廢罷少府
五鹿充宗左遷元菟太守御史中丞伊嘉為鴈門都尉
長安謠曰伊徙鴈鹿徙菟去牢與陳實無賈

賈讀
為價

後漢

鄭衆字季產南陽犍人也為人謹敏有心機永平中初給事太子家肅宗即位拜小黃門遷中常侍和帝初加位鉤盾令時竇太后秉政后兄大將軍憲等並竊威權朝臣上下莫不附之而衆獨一心王室不事豪黨帝親信焉及憲兄弟圖作不軌衆首謀誅之以功遷大長秋策勲班賞每辭多受少由是常與議事中官用權自衆始焉十四年帝念衆功美封為鄴鄉侯食邑千五百戶

永初元年和熹皇后益封三百戶元初元年卒養子閔
嗣閔卒子安嗣後國絕桓帝延熹二年詔封衆曾孫石
讐為關內侯

蔡倫字敬仲桂陽人也以永平末始給事宮掖建初中
為小黃門及和帝即位轉中常侍預參帷幄倫有才學
盡心敦謹數犯嚴顏匡弼得失每至休沐輒閉門絕賓
客暴體田野後加位尚方令永元九年監作秘劍及諸
器械莫不精工堅密為後世法自古書契多編以竹簡

其用縑帛者謂之為紙縑貴而簡重並不便於人倫乃造意用樹膚麻頭及敝布魚網以為紙元興元年奏上之帝善其能自是莫不從用焉故天下咸稱蔡侯紙元初元年鄧太后以倫久宿衛封為龍亭侯邑三百戶後為長樂太僕四年帝以經傳之文多不正定乃選通儒謁者劉珍及博士良史詣東觀各讐校漢家法令倫監典其事倫初受竇太后詆旨誣陷安帝祖母宋貴人及太后崩安帝始親萬幾勅使自致廷尉倫恥受辱乃沐

浴整衣冠飲藥而卒國除

孫程字稚卿涿郡新城人也安帝時為中黃門給事長
樂宮時鄧太后臨朝帝不親政事小黃門李閏與帝乳
母王聖常共譖太后兄執金吾惲等言欲廢帝立平原
王德帝每忿懼及太后崩遂誅鄧氏而廢平原王封閏
雍鄉侯又小黃門江京以諛諂進初迎帝於邸以功封
都鄉侯食邑各三百戶閏京並遷中常侍江京兼大長
秋與中常侍樊豐黃門令劉安鈞盾令陳達及王聖聖

女伯榮扇動外內競為侈虐又帝舅大將軍耿寶皇后
兄大鴻臚閭顯更相阿黨遂枉殺太尉楊震廢皇太子
為濟陰王明年帝崩立北鄉侯為天子顯等遂顓朝權
乃諷有司奏誅樊豐廢耿寶王聖及黨與皆見死徙十
月北鄉侯病篤程謂濟陰王謁者長興渠曰興姓渠名王以
嫡統本無失德先帝用讒遂至廢黜若北鄉疾不起共
斷江京閭顯事乃可成渠等然之又中黃門王康先為
太子府史自太子之廢常懷歎憤又長樂太官丞京兆

王國並附同於程至二十七日北鄉侯薨閭顯白太后徵諸王子簡可為帝嗣未及至十一月二日程遂與王康等十八人聚謀於西鐘下皆截單衣為誓四日夜程等共會崇德殿上因入章臺門時江京劉安及李閔陳達俱坐省門下程與王康共就斬京安達以李閔權執積為省內所服欲引為主因舉刃脅閔曰今當立濟陰王無得動搖閔曰諾於是扶閔起俱於西鐘下迎濟陰王立之是為順帝召尚書令僕射以下從輦幸南宮雲

臺程等留守省門遮扞內外閭顯時在禁中憂迫不知
所為小黃門樊登勸顯發兵以太后詔召越騎校尉馮
詩虎賁中郎將閭崇屯朔平門以禦程等誘詩入省太
后使授之印曰能得濟陰王者封萬戶侯得李閨者五
十戶侯顯以詩所將衆少使與登迎吏士于左掖門外
詩因格殺登歸營屯守顯弟衛尉景遽從省中還外府
收兵至盛德門程傳召諸尚書使收景尚書郭鎮時卧
病聞之即率直宿羽林出南止車門逢景從吏士拔白

夕呼曰無干兵鎮即下車持節詔之景曰何等詔因斫鎮不中鎮引劒擊景墮車左右以戟叉其胷遂禽之送廷尉獄即夜死旦日令侍御史收顯等送獄於是遂定乃下詔封孫程為浮陽侯食邑萬戶王康為華容侯王國為鄠侯各九千戶黃龍為湘南侯五千戶彭愷為西平昌侯孟叔為中廬侯李建為復陽侯各四千二百戶王成為廣宗侯張賢為祝阿侯史汎為臨沮侯馬國為廣平侯王道為范縣侯李元為襄信侯楊佗為山都侯

陳予為下雋侯趙封為析縣侯李剛為枝江侯各四千
戶魏猛為夷陵侯二千戶苗光為東阿侯千戶是為十
九侯加賜車馬金銀錢帛亦各有差李閏以先不豫謀
故不封遂擢拜程騎都尉永建元年程與張賢孟叔馬
國等為司隸校尉虞詡訟罪懷表上殿呵叱左右帝怒
遂免程官因悉遣十九侯就國後徙封程為宜城侯程
既到國怨恨恚懟封還印綬符策亡歸京師往來山中
詔書追求復故爵土賜車馬衣物遣還國三年帝念程

等功勲悉徵還京師程與王道李元皆拜騎都尉餘悉奉朝請陽嘉元年程病甚即拜奉車都尉位特進及卒使五官中郎將追贈車騎將軍印綬賜謚剛侯侍御史持節監護喪事乘輿幸北部尉傳瞻望車騎程臨終遺言上書以國傳弟美帝許之而分程半封程養子壽為浮陽侯後詔書錄微功封興渠為高望亭侯四年詔宦官養子悉聽得為後襲封爵著定于令王康王國彭愷王成趙封魏猛六人皆早卒黃龍楊佗孟叔李建張賢

史汎王道李元李剛九人與阿母山陽君宋娥更相貨賂求高官增邑又誣罔中常侍曹騰孟賁等永和二年發覺並遣就國減租四分之一宋娥奪爵歸田舍唯馬國陳子苗光保全封邑初帝見廢監太子家小黃門籍建傳高梵長秋長趙熹丞良賀藥長夏珍皆以無過獲罪建等坐徙朔方及帝即位竝擢為中常侍梵坐贓罪減死一等建後封東鄉侯三百戶賀清儉退厚位至大長秋陽嘉中詔九卿舉武猛賀獨無所薦帝引問其故

對曰臣生自草茅長於宮掖既無知人之名又未嘗交知士類昔衛鞅因景監以見有識知其不終今得臣舉者匪榮伊辱固辭之及卒帝思賀忠封其養子為都鄉侯三百戶

曹騰字季興沛國譙人也安帝時除黃門從官順帝在東宮鄧太后以騰年少謹厚使侍皇太子書特見親愛及帝即位騰為小黃門遷中常侍桓帝得立騰與長樂太僕州輔等七人以定策功皆封亭侯騰為費亭侯遷

大長秋加位特進騰用事省闥三十餘年奉事四帝未嘗有過其所進達皆海內名人陳留虞放邊韶南陽延固張溫弘農張奐潁川堂谿趙典等時蜀郡太守因計吏賂遺於騰益州刺史种暠於斜谷間搜得其書上奏太守并以劾騰請下廷尉案罪帝曰書自外来非騰之過遂寢暠奏騰不為纖介常稱暠為能吏時人嗟美之騰卒養子嵩嗣种暠後為司徒告賓客曰今身為公乃曹常侍力焉嵩靈帝時貨賂中官及輸西園錢一億萬

故位至太尉及子操起兵不肯相隨乃與少子疾避亂琅邪為徐州刺史陶謙所殺

單超河南人徐璜下邳良城人具瑗魏郡元城人左官河南平陰人唐衡潁川鄆人也桓帝初超璜瑗為中常侍宦衡為小黃門史初梁冀兩妹為順桓二帝皇后冀代父商為大將軍再世權戚威振天下冀自誅太尉李固杜喬等驕橫益甚皇后乘勢忌恣多所鴆毒上下鉗口莫有言者帝逼畏久常懷不平恐言泄不敢謀之延

熹二年皇后崩帝因如廁獨呼衡問左右與外舍不相
得者有誰乎衡對曰單超左官前詣河南尹不疑禮敬
小簡不疑收其兄弟送洛陽二人詣門謝乃得釋徐璜
具瑗常私忿疾外舍放橫口不敢道於是帝呼超官入
室謂曰梁將軍專固國朝迫脅外內公卿以下從其風
旨今欲誅之於常侍意何如超等對曰誠國姦賊當誅
日久臣等弱劣未知聖意如何耳帝曰審然者常侍密
圖之對曰圖之不難但恐陛下復中去聲狐疑帝曰姦臣

脅國當伏其罪何疑乎於是更召璜瑗等五人遂定其議帝齧超臂出血為盟於是詔收冀及宗親黨與悉誅之宦衡遷中常侍封超新豐侯二萬戶璜武原侯瑗東武陽侯各萬五千戶賜錢各千五百萬宦上蔡侯衡汝陽侯各萬三千戶賜錢各千三百萬五人同日封故世謂之五侯又封小黃門劉普趙忠等八人為鄉侯自是權歸宦官朝廷日亂矣超疾病帝遣使就拜車騎將軍明年薨賜東園秘器棺中玉具贈侯將軍印綬使者治

喪及葬發五營騎士將軍侍御史護喪將作大匠起冢

塋其後四侯轉橫天下為之語曰左回天具獨坐徐卧

虎唐兩墮

謂隨意不定也

皆競起第宅樓觀壯麗窮極伎巧金

銀爛耗施於犬馬多取良人美女以為姬妾皆珍飾華

侈擬則宮人其僕從皆乘牛車而從列騎又養其疏屬

或乞嗣異姓或買蒼頭為子並以傳國襲封兄弟姻戚

皆宰州臨郡辜較百姓與盜賊無異超弟安為河東太

守弟子匡為濟陰太守璜弟盛為河內太守怱弟敏為

陳留太守瑗兄恭為沛相皆為所在蠹害璜兄子宣為下邳令暴虐尤甚先是求故汝南太守下邳李嵩女不能得及到縣遂將吏卒至嵩家載其女歸戲射殺之埋著寺內時下邳縣屬東海汝南黃浮為東海相有告言宣者浮乃收宣家屬無少長悉考之掾吏以下固諫爭浮曰徐宣國賊今日殺之明日坐死足以瞑目矣即案宣罪棄市暴其尸以示百姓郡中震慄璜於是訴怨於帝帝大怒浮坐髡鉗輸作右校五侯宗族賓客虐徧天

下民不堪命起為寇賊七年衡卒亦贈車騎將軍如超
故事璜卒賻贈錢布賜冢塋地明年司隸校尉韓演因
奏宦罪惡及其兄太僕南鄉侯稱請託州郡聚斂為姦
賓客放縱侵犯吏民宦稱皆自殺演又奏瑗兄沛相恭
賊罪徵詣廷尉瑗詣獄謝上還東武侯印綬貶為都
鄉侯卒於家超及璜衡襲封者並降為鄉侯租入歲皆
三百萬子弟分封者悉奪爵土劉普等貶為關內侯
侯覽者山陽防東人桓帝初為中常侍以佞猾進倚執

貪放受納貨遺以巨萬計延熹中連歲征伐府帑空虚
乃假百官奉祿王侯租稅覽亦上縑五千匹賜爵闕內
侯又託以與誅梁冀功進爵高鄉侯小黃門段珪家在
濟陰與覽並立田業近濟北界僕從賓客侵犯百姓劫
掠行旅濟北相滕延一切收捕殺數十人陳尸路衢覽
珪大恐以事訴帝延坐多殺無辜徵詣廷尉免延字伯
行北海人後為京兆尹有治名世稱為長者覽等得此
愈放縱覽兄參為益州刺史民有豐富者輒誣以大逆

皆誅滅之沒入財物前後累億計太尉楊秉奏參檻車徵於道自殺京兆尹袁逢於旅舍閱參車三百餘兩皆金銀錦帛珍玩不可勝數覽坐免旋復復官建寧二年喪母還家大起塋冢督郵張儉因舉奏覽貪侈奢縱前後請奪人宅三百八十一所田百一十八頃起立第宅十有六區皆有高樓池苑臺閣相望飾以綺畫丹漆之屬制度重深潛類宮省又豫作壽冢石撐雙闕高廡百尺破人居室發掘墳墓虜奪良人妻畧婦子及諸罪釁

請誅之而覽伺候遮截章竟不上儉遂破覽冢宅籍沒
資財具言罪狀又奏覽母生時交通賓客干亂郡國復
不得御覽遂誣儉為鉤黨及故長樂少府李膺太僕杜
密等皆夷滅之遂代曹節領長樂太僕熹平元年有司
舉奏覽專權驕奢策收印綬自殺阿黨者皆免

曹節字漢豐南陽新野人也其本魏郡人世吏二千石
順帝初以西園騎遷小黃門桓帝時遷中常侍奉車都
尉建寧元年持節將中黃門虎賁羽林千人北迎靈帝

陪乘入宮及即位以定策封長安鄉侯六百戶時竇太
后臨朝后父大將軍武與太傅陳蕃謀誅中官節與長
樂五官史朱瑀從官吏共普張亮中黃門王尊長樂謁
者騰良等十七人共矯詔以長樂食監王甫為黃門令
將兵誅武蕃等事已具蕃武傳節遷長樂衛尉封育陽
侯增邑三千戶甫遷中常侍黃門令如故瑀封都鄉侯
千五百戶普亮等五人各三百戶餘十一人皆為關內
侯歲食租二千斛先是瑀等陰於明堂中禱皇天曰竇

氏無道請皇天輔皇帝誅之令事必成天下得寧既誅武等詔令太官給塞具賜瑀錢五十萬餘各有差後更封華容侯二年節病困詔拜為車騎將軍有頃疾瘳上印綬罷復為中常侍位特進秩中二千石尋轉大長秋熹平元年竇太后崩有何人書朱雀闕言天下大亂曹節王甫幽殺太后常侍侯覽多殺黨人公卿皆尸祿無有忠言者於是詔司隸校尉劉猛逐捕十日一會猛以誹書言直不肯急捕月餘主名不立猛坐左轉諫議大

夫以御史中丞段熲代猛乃四出逐捕及太學游生繫者千餘人節等怨猛不已使熲以他事奏猛抵罪輸左校朝臣多以為言乃免刑復公車徵之節遂與王甫等誣奏桓帝弟勃海王悝謀反誅之以功封者十二人甫封冠軍侯節亦增邑四千六百戶并前七千六百戶父子兄弟皆為公卿列校牧守令長布滿天下節弟破石為越騎校尉越騎營五百妻有美色破石從求之五百不敢違妻執意不肯行遂自殺其淫暴無道多此類也

光和二年司隸校尉陽球奏誅王甫及子長樂少府萌
沛相吉皆死獄中時連有災異郎中梁人審忠以為朱
瑤等罪惡所感乃上書條陳其罪乞一切誅戮章寢不
報節遂領尚書令四年卒贈車騎將軍後瑤亦病卒皆
養子傳國審忠字公誠宦官誅後辟公府

呂彊字漢盛河南成臯人也少以宦者為小黃門再遷
中常侍為人清忠奉公靈帝時例封宦者以彊為都鄉
侯彊辭讓懇惻固不敢當帝乃聽之因上疏陳事曰臣

聞諸侯上象四七下裂王土高祖重約非功臣不侯所以重天爵明勸戒也伏聞中常侍曹節王甫張讓等及侍中許相並為列侯節等宦官祜薄品卑人賤諛諂媚主邪佞微寵放毒人物疾妬忠良俱有趙高之禍未被輟裂之誅掩朝廷之明成私樹之黨而陛下不悟妄授茅土開國承家小人勿用又并及家人重金兼紫相繼為蕃輔受國厚恩不念爾祖述修厥德而交結邪黨下比羣佞陛下惑其瑣才特蒙恩澤又授位乖越賢才不

升素餐私倖必加榮擢陰陽乖刺稼穡荒蕪人用不康
罔不由茲臣誠知封事已行言之無逮所以冒死干觸
陳愚忠者實願陛下損改既謬從此一止臣又聞後宮
綵女數千餘人衣食之費日數百金比穀雖賤而戶有
饑色案法當貴而今更賤者由賦發繁數以解縣官寒
不敢衣饑不敢食民有斯厄而莫之恤宮女無用填積
後庭天下雖盡力耕桑猶不能供昔楚女悲愁則西宮
致災况終年積聚豈無憂怨乎夫天生蒸民立君以牧

之君道得則民戴之如父母仰之猶日月雖時有征稅猶望其仁恩之惠易曰悅以使民民忘其勞悅以犯難民忘其死儲君副主宜諷誦斯言南面當國宜履行其事又承詔書於河間故國起解瀆之館陛下龍飛即位雖從藩國然處九天之高豈宜有顧戀之意且河間踈遠解瀆邈絕而當勞民單力未見其便又今外戚四姓貴倖之家及中官公族無功德者造起館舍凡有萬數樓閣相接丹青素壁雕刻之飾不可單言喪葬踰制奢

麗過禮競相倣倣莫肯矯拂穀梁傳曰財盡則怨力盡則懟尸子曰君如扞民如水扞方則水方扞圓則水圓上之化下猶風之靡草今上無去奢之儉下有縱欲之弊至使禽獸食民之甘土木衣民之帛昔師曠諫晉平公曰梁柱衣繡民無褐衣池有棄酒士有渴死廐馬秣粟民有饑色近臣不敢諫遠臣不得暢此之謂也又聞前名議郎蔡邕對問於金商門而令中常侍曹節王甫等以詔書喻旨邕不敢懷道迷國而切言極對毀刺貴

臣譏訶豎宦陛下不密其言至令宣露羣邪項領膏唇
拭舌競欲咀嚼造作飛條陛下回受誹謗致邕刑罪室
家徙放老幼流離豈不負忠臣哉今羣臣皆以邕為戒
上畏不測之難下懼劍客之害臣知朝廷不復得聞忠
言矣故太尉段熲武勇冠世習於邊事垂綏服戎功成
皓首歷事二主勲烈獨昭陛下既已式序位登台司而
為司隸校尉陽球所見誣脅一身既斃而妻子遠播天
下惆悵功臣失望宜徵邕更授任反熲家屬則忠貞路

開衆怨以弭矣帝知其忠而不能用時帝多蓄私藏收天下之珍每郡國貢獻先輸中署名為導行費彊上疏諫曰天下之財莫不生之陰陽歸之陛下歸之陛下豈有公私而今中尚方斂諸郡之寶中御府積天下之繒西園引司農之藏中廐聚大僕之馬而所輸之府輒有導行之財調廣民困費多獻少姦吏因其利百姓受其敝又阿媚之臣好獻其私容諂姑息自此而進舊典選舉委任三府三府有選參議掾屬咨其行狀度其器能

受試任用責以成功若無可察然後付之尚書尚書舉
劾請下廷尉覆案虛實行其誅罰今但任尚書或復勅
用如是三公得免選舉之負尚書亦復不坐責賞無歸
豈肯空自勞苦乎夫立言無顯過之咎明鏡無見玼之
尤如惡立言以記過則不當學也不欲明鏡之見玼則
不當照也願陛下詳思臣言不以記過見玼為責書奏
不省中平元年黃巾賊起帝問彊所宜施行彊欲先誅
左右貪濁者大赦黨人料簡刺史二千石能否帝納之

乃先赦黨人於是諸常侍人人求退又各自徵還宗親子弟在州郡者中常侍趙忠夏憚等遂共構彊云與黨人共議朝廷數讀霍光傳彊兄弟所在並皆貪穢帝不悅使中黃門持兵召彊彊聞帝召怒曰吾死亂起矣丈夫欲盡忠國家豈能對獄吏乎遂自殺忠憚復譖曰彊見召未知所問而就外草自屏有姦明審遂收捕宗親沒入財產焉時宦者濟陰丁肅下邳徐衍南陽郭耽及汝陽李巡北海趙祐等五人稱為清忠皆在里巷不爭

威權巡以為諸博士試甲乙科登第高下更相告言至有行路定蘭臺漆書經字以合其私文者乃白帝與諸儒共刻五經文於石於是詔蔡邕等正其文字自後五經一定爭者用息趙祐博學多覽著作校書諸儒稱之又小黃門甘陵吳伉善為風角博達有奉公稱知不得用常託病還寺舍從容養志云

張讓者潁川人趙忠者平安人也少皆給事省中桓帝時為小黃門忠以與誅梁冀功封都鄉侯延熹八年黜

為關中侯食本縣租千斛靈帝時讓忠並遷中常侍封
列侯與曹節王甫等相為表裏節死後忠領大長秋讓
有監奴典任家事交通貨賂威形誼赫扶風人孟佗資
產饒贍與奴朋結傾竭饋問無所遺受奴咸德之問佗
曰君何所欲力能辦也曰吾望汝曹為我一拜耳時賓
客求謁讓者車恒數百千兩佗時詣讓後至不得進監
奴乃率諸蒼頭迎拜於路遂共輦車入門賓客咸驚謂
佗善於讓皆爭以珍玩賂之佗分以遺讓讓大喜遂以

佗為涼州刺史是時讓忠及夏憚郭勝孫璋畢嵐栗嵩
段珪高望張恭韓攄宋典十二人皆為中常侍封侯貴
寵父子兄弟布列州郡所在貪殘為人蠹害黃巾既作
盜賊糜沸郎中中山張鈞上書曰竊惟張角所以能興
兵作亂萬人所以樂附之者其源皆由十常侍多放父
子兄弟婚親賓客典據州郡辜擢財利侵掠百姓百姓
之冤無所告訴故謀議不軌聚為盜賊宜斬十常侍縣
頭南郊以謝百姓又遣使者布告天下可不須師旅而

大寇自消天子以鈞章示讓等皆免冠徒跣頓首乞自致洛陽詔獄並出家財以助軍費有詔皆冠履視事如故帝怒鈞曰此真狂子也十常侍固當有一人善者不鈞復重上猶如前章輒寢不報詔使廷尉侍御史考為張角道者御史承讓等旨遂誣奏鈞學黃巾道收掠死獄中而讓等實多與張角交通後中常侍封諤徐奏事獨發覺坐誅帝因怒詰讓等曰汝曹常言黨人欲為不軌皆令禁錮或有伏誅今黨人更為國用汝曹反與張

角通為可斬未皆叩頭云故中常侍王甫侯覽所為帝
乃止明年南宮災讓忠等說帝令斂天下田畝稅十錢
以修宮室發太原河東狄道諸郡材木及文石每州郡
部送至京師黃門常侍輒令譴呵不中者因彊折賤買
十分雇一因復貸之於宦官復不為即受材木道至腐
積宮室連年不成刺史太守復增私調百姓呼嗟凡詔
所徵求皆令西園騶密約勅號曰中使恐動州郡多受
賕賂刺史二千石及茂才孝廉遷除皆責助軍修宮錢

大郡至二三十萬餘各有差當之官者皆先至西園諧
價然後得去有錢不畢者或至自殺其守清者乞不之
官皆迫遣之時鉅鹿太守河內司馬直新除以有清名
減責三百萬直被詔悵然曰為民父母而反割剝百姓
以稱時求吾不忍也辭疾不聽行至孟津上書極陳當
世之失古今禍敗之戒即吞藥自殺書奏帝為暫絕修
宮室錢又造萬金堂於西園引司農金錢繒帛仞積其
中又還河間買田宅起第觀帝本侯家宿貧每歎桓帝

不能作家居故聚為私藏復藏寄小黃門常侍錢各數
千萬常云張常侍是我公趙常侍是我母宦者得志無
所畏憚並起第宅擬則宮室帝常登永安侯臺宦官恐
其望見居處乃使中大夫尚但諫曰天子不當登高登
高則百姓虛散自是不敢復升臺榭明年遂使鉤盾令
宋典繕修南宮玉堂又使掖庭令畢嵐鑄銅人四列於
蒼龍玄武闕又鑄四鐘皆受二千斛縣於玉堂及雲臺
殿前又鑄天祿蝦蟇吐水於平門外橋東轉水入宮又

作翻車渴烏施於橋西用灑南北郊路以省百姓灑道之費又鑄四出文錢錢皆四道識者竊言侈虐已甚形象兆見此錢成必四道而去及京師大亂錢果流布四海復以忠為車騎將軍百餘日罷六年帝崩中軍校尉袁紹說大將軍何進令誅中官以悅天下謀泄讓忠等因進入省遂共殺進而紹勒兵殺忠捕宦官無少長皆斬之讓等數十人刼質天子走河上追急讓等悲哭辭曰臣等殄滅天下亂矣惟陛下自愛皆投河而死

後魏

宗愛不知其所由來以罪為閹人歷碎職至中常侍正平元年元正太武大會於江上班賞羣臣以愛為秦郡公景穆之監國也每事精察愛天性險暴多行非法景穆每銜之給事中侯道盛侍郎任平城等任事東宮微為權勢太武頗聞之二人與愛並不睦愛懼道盛等案其事遂構告其罪詔斬道盛等於都街時太武震怒景穆遂以憂薨是後太武追悼景穆不已愛懼誅遂謀逆

二年春太武暴崩愛所為也尚書左僕射蘭延侍中吳興公和正侍中太原公薛提等秘不發喪延正二人議以文成沖幼欲立長君徵秦王翰置之秘室提以文成有世嫡之重不可廢所宜立而更求長君延等猶豫未決愛知其謀始愛負罪於東宮而與吳王余素協乃密迎余自中宮便門入矯皇后令徵延等延等以愛素賤弗之疑皆隨之入愛先使閹豎三十人持仗於宮內及延等入以次收縛斬於殿堂執秦王翰殺之於永巷而

立余余以愛為大司馬大將軍太師都督中軍諸軍事
領中秘書封馮翊王愛既立余位居元輔錄三省兼總
戎禁坐召公卿權恣日甚內外憚之羣情咸以為愛必
有趙高閹樂之禍余疑之遂謀奪其權愛憤怒使小黃
門賈周等夜殺余文成立誅愛周等皆具五刑夷三族
仇洛齊中山人也本姓侯氏外祖父仇款始居馮翊重
泉款仕石虎虎末徙鄴南枋頭仕慕容暉為烏丸護軍
長水校尉生二子長曰嵩小曰騰嵩仕慕容垂遷居中

山位殿中侍御史嵩有二子長曰廣小曰盆嵩妹子洛
齊生而非男嵩養為子因為仇姓初嵩長女有姿色充
冉閔婦閔破入慕容儁又傳賜盧豚生子魯元魯元有
寵於太武而知外祖嵩已死唯有三舅每言於帝帝為
訪其舅時東方罕有仕者廣益皆不樂入平城洛齊獨
請行曰我養子無人道不全當為兄弟試禍福也乃乘
驢赴京魯元候知將至結從者百餘騎迎于桑乾河見
而下拜從者亦同致敬入言於太武太武問其才用所

宜魯元曰臣舅不幸生為閹人唯合與陛下守宮闈耳
而不言其養子帝矜焉引見叙用賜爵文安子稍遷給
事黃門侍郎魏初禁網疎濶人戶隱匿漏脫者多東州
既平綾羅戶人樂葵因是請採漏戶供為綸縣自後逃
戶占為紬綾羅縠者非一於是雜營戶帥遍於天下不
屬守宰發賦輕易人多私附戶口錯亂不可檢括洛齊
奏議罷之一屬郡縣從征平涼以功超遷散騎常侍又
加中書令進爵零陵公拜侍中冀州刺史內都大官卒

謚曰康養子儼襲爵太武時又有段霸以謹敏見知歷中常侍殿中尚書定州刺史

孫小字茂翹咸陽石安人也父瓚姚泓安定護軍為赫連屈丐所殺小沒入宮刑會魏平統萬遂歸平城內侍東宮以聰識有智畧稱未幾轉西臺中散太武幸瓜步慮有北寇之虞賜爵泥陽子除留臺將軍車駕還都乃請父瓚贈謚求更改葬詔贈秦州刺史石安縣子謚曰戴小後拜并州刺史進爵中都侯州內四郡百餘人詣

闕頌其政化後遷冀州刺史聲稱微少於前然所在清約當時牧伯無能及也性頗忍酷所養子息驅逐鞭撻視如仇讐小之為并州以郭祚為主簿重祚文才兼任以書記時人多之

趙默字文靜初名海本涼州隸戶自云其先河內溫人也五世祖術晉末為西夷校尉因居酒泉安彌縣海生而涼州平沒入為閹人因改名默有容貌恭謹小心賜爵關內侯累遷選部尚書能自謹勵當官任舉頗得其

人加侍中進爵河內公獻文將傳位京兆王子推訪諸
羣臣百官唯唯莫敢先言唯源賀等辭義正直不肯奉
詔獻文怒變色復以問默默對曰臣以死奉戴皇太子
不知其他獻文默然良久遂傳位于孝文孝文立默得
幸兩宮祿賜優厚時尚書李訢亦有寵於獻文與默對
綰選部訢奏中書侍郎崔鑒為東徐州比部主書郎公
孫處顯為荊州選部監公孫邃為幽州皆曰用能實有
私焉默疾其虧亂選體遂爭於殿庭曰以功授官因爵

與祿國之常典中書侍郎尚書主書郎諸曹監勲能俱立不過列郡今訢皆以為州臣實為惑獻文從之於是默與訢遂為深隙訢竟列默為監藏因黜為門士默廢寢忘食規報前怨踰年還入為侍御散騎常侍侍中尚書左僕射復兼選部如昔及訢將獲罪默因構成以誅之然後食甘寢安志於職事出為鎮南大將軍儀同三司定州刺史進爵為王克己清儉憂濟公私時或有人欲行私賂默曰官高祿厚足以自給賣公營私本非情

願終無所納帝聞之賜帛五百疋穀一千石後薨於冀州刺史追贈司空謚曰康子熾嗣

王琚高平人也自云本太原人高祖始晉豫州刺史琚以泰恒中被刑入宮禁小心守節久乃見叙用稍遷禮部尚書賜爵廣平公孝文以琚歷奉前朝志存公正授散騎常侍後歷位冀州刺史假廣平王進爵高平王孝文文明太后東巡冀州親幸其家還京以其年老拜散騎常侍養老於家前後賜以車馬衣物不可稱計及降

爵為公扶老自平城從遷洛邑常飲牛乳色如處子卒
年九十贈冀州刺史謚靖公

張宗之字益宗河南鞏人也家世寒微父孟舒晉將劉
裕西征板假洛陽令初緱氏宗文邕謀反脅孟舒等起
事孟舒敗走免宗之被執入京腐刑以忠厚謹慎擢為
侍御中散賜爵鞏縣侯歷儀曹庫部二曹尚書領中秘
書進爵彭城公後例降為侯卒於冀州刺史贈懷州刺
史謚曰敬始宗之納南來殷孝祖妻蕭氏宋儀同三司

思話弟思度女也多悉婦人儀飾故事太和中初制六
宮服章蕭被命在內預見訪採數蒙賜賚云

劇鵬高陽人也粗覽經史閑曉吏事與王質等俱充宦
官性通率不以閹閹為恥孝文遷洛常為宦官任事幽
后之惑薛菩薩也鵬密諫止之不從遂發憤卒

張祐字安福安定石唐人也父成扶風太守太武末坐
事誅祐充腐刑積勞至都館內藏曹給事中時文明太
后臨朝中官用事祐以左右供承合旨寵幸冠諸閹宦

特遷為尚書進爵隴東公仍綰內藏曹未幾監都曹加
侍中與王叡等俱入八議太后嘉其忠誠為造甲第宅
成孝文太后親率文武往宴會焉拜尚書左僕射進爵
新平王受職於太華庭備威儀於宮城之南觀者以為
榮孝文太后親幸其宅饗會百官祐性恭密出入機禁
二十餘年未曾有過由是特被恩寵歲月賞賜家累巨
萬與王質等十七人俱賜金券許以不死太和十年薨
孝文親臨之詔鴻臚典護喪事贈司空謚曰恭葬日車

駕親送近郊祐養子顯明後名慶少歷內職有姿貌江陽王繼以女妻之襲爵降為隴東公又降為侯

抱嶷字道德安定石唐人也居於直谷自言其先姓杞漢靈帝時杞匡為安定太守董卓時懼誅易氏即家焉無得而知也幼時隴東人張乾王反家染其逆及乾王敗父睹生逃免嶷獨與母沒入內宮受刑遂為宦人小心慎密累遷中常侍中曹侍御尚書賜爵安定公自總納言職當機近諸所奏議必致抗直孝文文明太后嘉

之以為殿中侍御尚書太后既寵之乃徵其父睹生拜
太中大夫將還見於皇信堂孝文執手曰老人歸途幾
日可達好慎行路其見幸如此睹生卒贈秦州刺史謚
曰靖賜黃金八十斤繒綵及絹八百疋以供喪用并別
使勞慰加嶷大長秋卿嶷老疾乞外祿乃出為涇州刺
史特加右光祿大夫將之州孝文餞於西郊樂陽殿以
御白羽扇賜之十九年以刺史從駕南征以老舊每見
勞問數追稱嶷之正直命乘馬出入行禁之間與司徒

馮誕同例軍迴還州自以故老前官為政多守往法不能遵用新制侮慢士族簡於禮接天性酷薄雖弟姪甥壻畧無存潤卒於州先以從弟老壽為後又養太師馮熙子次興疑死後二人爭立疑妻張氏致訟經年得以熙子為後老壽亦仍陳訴終獲紹爵次興還於本族老壽凡薄酒色肆情御史中尉王顯奏言前洛州刺史陰平子石榮積射將軍抱老壽恣蕩非軌易室而姦臊聲布於朝野醜音被於行路男女三人莫知誰子人理所

未聞鳥獸之不若請以見事免官付廷尉正臯詔可之
老壽死後其舊奴婢尚六七百人老壽及石榮祖父皆
造碑銘就鄉建立言西方直谷出二貴人石榮自被劾
爵遂廢嗣子長宣位南兗州刺史與侯景反伏法

王遇字慶時本名他惡馮翊李潤鎮羗也與雷光不蒙
俱為羌中彊族自云其先姓王後改為鉗耳氏宣武時
改為王焉自晉已來恒為渠長遇坐事腐刑累遷吏部
尚書爵宕昌公出為華州刺史加散騎常侍幽后之前

廢也遇頗言其過及後進幸孝文對李沖等申后無咎而稱遇謗議之罪遂免遇官奪其爵宣武初為光祿大夫復舊爵馮氏為尼也公私罕相供恤遇自以嘗更奉接往來祇謁不替舊敬遇性工巧彊於部分北都方山靈泉道俗居宇及文明太后陵廟洛京東郊馬射壇殿修廣文昭太后墓園及東西兩堂內外諸門制度皆遇監作雖年在耆老而朝夕不倦遇長於人事留意酒食之間每逢寮舊觴膳精豐然競於榮利趨求勢門趙修

之寵也遇深附會受勅為之造宅增於本旨笞擊作人
莫不嗟怨卒於官初遇之疾太傅北海王與太妃俱往
臨問視其危假為之泣下其善奉諸貴致相悲悼如此
贈雍州刺史

苻承祖畧陽氏人也因事為閹人為文明太后所寵賜
爵畧陽公歷吏部尚書加侍中知都曹事初太后以承
祖居腹心之任許以不死之詔後承祖坐賊應死孝文
原之命削職禁錮在家授悖義將軍佞濁子月餘遂死

王質字紹奴高陽易人也其家坐事幼下蠶室頗解書
學為中曹吏內典監稍遷秘書中散賜爵永昌子領監
御遷為侍御給事又領選部監御二曹事進爵魏昌侯
轉選部尚書出為瀛州刺史風化粗行人庶畏服之而
刑政峻刻號為威酷孝文頗念其忠勤宿舊每行留大
故馮司徒亡廢馮后陸叡穆泰等事皆賜質以璽書手
筆莫不委至同之戚貴質皆寶掌入為大長秋卿卒

李堅字次壽高陽易人也文成初坐事為閹人稍遷給

事中賜爵魏昌伯小心謹慎常在左右雖不及王遇王質等而亦見任用宣武初自太僕卿出為瀛州刺史本州之榮同於王質所在受納家產巨萬卒於光祿大夫贈相州刺史太和末又有秦松白整位並長秋卿

劉騰字青龍平原城人也徙屬南兗州之譙郡幼時坐事受刑補小黃門轉中黃門孝文之在懸瓠騰使詣行在所帝問其中事騰具言幽后私隱與陳留公主所告符協由是進冗從僕射仍中黃門後與茹皓使徐兗求

召人女還遷中給事靈太后臨朝以預于忠保護勲除
崇訓太僕加侍中封長樂縣公拜其妻魏氏為鉅鹿郡
君每引入內受賞賚亞於諸主外戚所養二子為郡守
尚書郎騰曾疾篤靈太后慮或不救遷衛將軍儀同三
司後疾瘳拜命孝明當為臨軒會大風寒乃遣使持節
授之騰幼充宮役手不解書裁知署名而已而姦謀有
餘善射人意靈太后臨朝特蒙進寵多所干託內外碎
密栖栖不倦洛北永橋太上公太上君及城東三寺皆

主修營吏部嘗望騰意奏其弟為郡帶戍人資乖越清
河王懌抑而不與騰以為恨遂與領軍元义害懌廢靈
太后於宣光殿宮門晝夜長閉內外斷絕騰自執管籥
明帝亦不得見裁聽傳食而已太后服膳俱廢不免饑
寒义使中常侍賈粲假言得明帝書密令防察义以騰
為司空表裏擅權共相樹置义為外禦騰為內防迭直
禁闥共裁刑賞騰遂與崔光同受詔乘步挽出殿門四
年之中生殺之威決於义騰之手八座九卿旦造騰宅

參其顏色然後赴省府亦有歷日不能見者公私屬請
唯在財貨舟車之利水陸無遺山澤之饒所在固護剝
削六鎮交通互市歲入利息以巨萬計又頗役嬪御時
有徵求婦女器物公然受納逼奪鄰居開廣室宇天下
咸患之正光四年薨于位中官為義息縗經者四十餘
人騰之立宅也奉車都尉周恃為之筮不吉深諫止之
騰怒而不用恃告人曰必困於三月四月之交至是果
死廳事甫成陳尸其下追贈太尉冀州刺史葬日閭宦

為義服杖經衰縞者以百數朝貴皆從軒蓋填塞相屬郊野魏初以來權閹存亡之盛莫及焉靈太后反政追奪爵位發其冢散露骸骨沒入財產後騰所養一子叛入梁太后大怒悉徙騰餘養子於北裔尊遣密使殺之於汲郡

賈粲字季宣酒泉人也太和中坐事腐刑頗涉書記與元叉劉騰等同其謀謨進光祿勳卿專侍明帝與叉騰等同帝動靜右衛奚康生之謀殺叉也靈太后明帝同

升於宣光殿左右侍臣俱立西階下康生既被囚執粲
給太后曰侍官懷恐不安陛下宜親安慰太后信之適
下殿粲便扶明帝出東序前御顯陽還開太后於宣光
殿粲既又黨威福亦震於京邑自云本出武威魏太尉
文和之後遂移家屬焉時武威太守韋景承粲意以其
兄緒為功曹緒時年向七十未幾又以緒為西平太守
靈太后反政欲誅粲以又騰黨與不一恐驚動內外乃
止出粲為濟州刺史未幾遣武衛將軍刁宣馳駟殺之

楊範字法僧長樂廣宗人也文成時坐事宮刑為王琚
所養恩若父子累遷為中尹靈太后臨朝為中常侍崇
訓太僕領中嘗藥典御賜爵華陰子出為華州刺史中
官內侍貴者靈太后皆許其方岳以範年長拜跪為難
故遂其請父子納貨為御史所糾遂廢於家後為崇訓
太僕華州大中正卒

成軌字洪義上谷居庸人也少以臯刑入事宮掖以謹
厚稱為中謁者僕射孝文意有所欲軌候容色時有奏

發輒合帝心從駕南征專進御食時孝文不豫常居禁中晝夜無懈延昌末遷中常侍嘗食典御光祿大夫統京染都將孝昌二年以勤舊封始平縣伯明帝所幸潘嬪以軌為假父頗為中官之所敬憚後進爵為侯卒於衛將軍贈雍州刺史謚曰孝惠

王溫字桃湯趙郡欒城人也父冀高邑令坐事誅溫與兄繼叔俱充宦者稍遷中嘗食典御中給事加左中郎將宣武之崩羣官迎明帝於東宮溫於卧中起明帝與

保母扶抱明帝入踐帝位高陽王雍既居冢宰慮中人朋黨出為鉅鹿太守靈太后臨朝徵為中常侍賜爵樂城伯累遷左光祿大夫光祿勳卿侍中進爵樂城縣侯溫自陳本陽平武陽人改封武陽縣侯建義初於河陰遇害

孟欒字龍兒不知何許人也坐事為閹人靈太后臨朝為左中郎將給事中素被病面常黯黑於九龍殿下暴疾歸家其夜亡欒初出靈太后聞之曰欒必不濟我為

之憂及奏其死為之下淚曰其事我如此不見我一日
忻樂時也賜帛三百疋黃金一十斤以供喪用七日靈
太后為設二百僧齋

平季字幼穆燕國薊人也坐事腐刑累遷新興太守明
帝崩與爾朱榮等議立莊帝莊帝即位超拜肆州刺史
尋除中侍中以參謀勲封元城縣侯永熙中加驃騎大
將軍卒

封津字醜漢勃海蓆人也父令德娶常寶女寶伏誅令

德以連坐伏法津受刑給事官掖累遷奉車都尉中給事中靈太后令津侍明帝書遷常山太守津少長宮闈給事左右善候時情號為機悟天平初除開府儀同三司懷州刺史元象初復為中侍中大長秋卿仍開府儀同薨贈司徒冀州刺史謚曰孝惠

劉思逸平原人也以罪少充腐刑初為小史累遷中侍中武定中與元瑾等謀反伏誅又有張景嵩毛暢者咸以閹寺在明帝左右靈太后亦密仗之通傳意計於明

帝元乂之出景嵩暢頗有力焉靈太后反政以妹故未
即戮乂時内外喧喧云乂還欲入知政事暢等恐禍及
已乃啓明帝欲詔右衛將軍楊津密往殺乂詔書已成
未及出外乂妻知之告太后景嵩暢與清河王息邵欲
廢太后太后信之責暢暢出詔草以呈太后太后讀之
知無廢已狀意小解然乂妻搆之不已出暢為潁邱太
守景嵩為魯郡太守尋令捕殺暢景嵩孝靜時位至中
侍中坐事死

北齊

宦者韓寶業盧勒又齊紹泰子徵並神武舊左右唯閭
內驅使不被恩遇歷天保皇建之朝亦不至寵幸但漸
有職任寶業至長秋卿勒又等或為中常侍武成時有
曹文標夏侯通伊長游魯恃伯郭沙彌鄧長顓及寶業
輩或有至儀同食幹者唯長顓武平中任參宰相干預
朝權如寶業及勒又齊紹子徵後並封王俱自收斂不
過侵暴又有陳德信亦參時宰與長顓並開府封王俱

為侍中左右光祿大夫領侍中又有潘師子崔孝禮劉萬通研胥光弁劉通遠王弘遠王子立王元昌高伯華左君才熊純陀宮鍾馗趙野乂徐世凝荀子溢斛子慎宋元賓康德汪並於後主之朝肆其姦佞敗政虐民古今未有多授開府罕止儀同亦有加光祿大夫金章紫綬者多帶中侍中中常侍此二職乃至數十人恒出入門禁往來園苑趨侍左右通宵累日承候顏色競進凶逆發言動意多會深旨一戲之賞動逾巨萬邱山之積

貪恡無厭猶以波斯狗為儀同郡君分其幹祿神虎門
外有朝貴憇息之所時人號為解卸聽諸閹或在內多
日暫放歸休所乘之馬牽至神虎門階然後升騎飛鞭
競走十數為羣馬塵必至諸貴爰至唐趙韓駱皆隱聽
趨避不敢為言齊盧陳鄧之徒亦意屬尚書卿尹宰相
既不為致言時主亦無此命唯以工巧務功用長顙為
太府卿焉神武時有倉頭陳山提蓋豐樂俱以驅馳便
僻頗蒙恩遇魏末山提通州刺史豐樂嘗食典御又有

劉郁斤趙道德劉挑枝梅勝郎辛洛周高洛舍郭黑面
李銅提王恩洛並為神武驅使天保太寧之朝漸以貴
盛至武平時山提等皆以開府封王其不及武平者則
追贈王爵雖賜與無貲顧眄深重乃至陵忽宰輔然皆
不得干預朝政武平時有胡小兒俱是康阿駄穆叔兒
等富家子弟簡選黠慧者數十人以為左右恩眄出處
殆與宦者相埒亦有至開府儀同者其曹僧奴僧奴子
妙達以能彈胡琵琶甚被寵遇俱開府封王又有何海

及子洪珍開府封王尤為親要洪珍侮弄權勢鬻獄賣官其何朱弱史醜多之徒十數人咸以能舞工歌及善音樂者亦至儀同開府閹官猶以宮掖驅馳便煩左右漸因昵狎以至太官倉頭始自家人情寄深密及於後主則是先朝舊人以勤舊之勞致此叨竊至於胡小兒等眼鼻深嶮一無可用非理愛好排突朝貴尤為人士之所疾惡其以音樂至大官者沈過免官至開府儀同王長通年十四五便假節通州刺史時又有開府薛榮

宗常自云能使鬼及周兵之逼言於後主曰臣已發遣
斛律明月將大兵在前去帝信之經古冢榮宗謂舍人
元恭是誰冢元恭戲之曰林宗冢復問林宗是誰元恭
曰郭元貞父榮宗前奏曰臣向見郭林宗從冢出著大
帽吉莫靴捶馬鞭問臣我阿貞來不時羣妄多皆類此

通志卷一百七十九